





505



法苑珠林

一六



法苑珠林卷第四十九

身土都西明寺次

北齊書

敬宗傳



演惠明於百


倫於法界名

萬面金蓮度

也

引證部





法苑珠林卷第四十九

唐上都西明寺沙門釋道世玄暉撰

華香篇第三十三

述意部

敬尋釋迦降神羅衛託質玉宮智實生知道惟徧覺
演惠明於百億注法雨於大千靈像周於十方寶塔
徧於法界名香鬱馥似輕雲而散霧寶華含彩若倒
藕而坐蓮虔誠供養同趣法筵叩頭彈指俱霑福利
也

引證部

撰述
如佛說華聚陀羅尼經云佛言若復有人於如來滅
度之後行於曠路見如來塔廟能持一華一燈若一
團泥用塗像前以用供養乃至能持一錢施於佛像
爲補治故若以一掬水用灑佛塔除去不淨以華香
供養舉足一步詣於塔寺若一稱南無佛欲使此人
墮三惡道百千萬劫終無是處又正法念經云若有
衆生若持香塗佛塔命終生香樂天與諸天女常相
娛樂從天命終得受人身生大富家又阿闍世王經
云過去無數劫有佛號一切度與其眷屬俱行分衛
有三尊者子嚴服共戲見佛及諸菩薩光眈巍巍互

相指示而吾等當共供養二兒答言旣無香華當用
何物其一兒脫頭上白珠以著手中便謂二兒可以
供佛二兒効之解頭上白珠著其手中卽至佛所一
兒復問二兒持是功德以何求索其一兒言願如佛
右面比丘其一兒言願如佛左面神足比丘二兒共
問一兒報言我欲如佛八千天子皆言善哉善哉若
如所言天上天下一切蒙恩是三小兒已到佛前各
以白珠而散佛上二兒發聲聞意者珠在佛肩上其
一兒發菩提心者珠在佛頭上化爲珠華交露之帳
其中有佛佛告舍利弗中央兒者則我身是右面兒

撰述
三法苑珠林卷四十九
二
者舍利弗是左面見者目連是舍利弗汝等本畏生死故不發菩薩心欲疾泥洹觀此一見發阿耨菩提故得成佛又採華授決經云時有羅閱國王使十餘人常採好華以給王家後宮貴人一日出城採華遇佛發心稽首爲禮心自念言寧棄身命以華上佛并散聖衆縱使見害不墮苦痛便以華散佛及聖衆卻自歸命一心重禮佛知其念甚慈愍之具爲說法諸採華人皆發道意佛卽授決後當得佛號曰妙華時採華夫還歸家中與二親別我今命盡爲王見殺父母愕然問何罪咎具答所由無華貢王必見危命故

辭別耳二親聞之益以愁感發篋視之滿中好華香徹四面父母告曰可以進王時王大瞋見不時來將人反縛罪當棄市入宮見王面色不變王怪問之汝等罪過命在當殺何故不懼卽白王曰人生有死物成有敗無以非法不憍身命朝來採華值佛供上以知違命罪當合死寧以有德而死不以無德而存還視華篋續滿如故皆是如來恩仁所覆王甚怪之心不信然故詣佛所問佛是意佛言實然此人至心欲度十方不憍身命故取衆華以散佛上意無想報以得受決將來成佛號曰妙華王大歡喜解縛悔過自

法苑珠林卷四十九
三
責愚意不及菩薩唯原其罪佛言善哉能自改者與
無過同又百緣經云佛在舍衛國祇樹給孤獨園爾
時世尊將諸比丘著衣持鉢將詣乞食至一巷中有
一婦女抱一小兒在巷坐地時彼小兒逢見世尊心
懷歡喜從母索華母卽與買小兒得已持詣佛所散
於佛上於虛空中變成華蓋隨佛行佳小兒見已甚
大歡喜發大誓願以此供養善根功德使我來世得
成正覺過度衆生如佛無異爾時世尊見此小兒發
是願已佛卽微笑從其面門出五色光遶佛三匝還
從頂入爾時阿難前白佛言如來尊重不妄有笑以

何因緣今日微笑唯願世尊敷演解說佛告阿難汝
今見此小兒以華散我於未來世不墮惡趣天上人
中常受快樂過十三阿僧祇成辟支佛號曰華盛廣
度衆生不可限量是故笑耳爾時諸比丘聞佛所說
歡喜奉行又百緣經云佛在舍衛國祇樹給孤獨園
時彼城中豪富長者皆共聚集詣泉水上作唱妓樂
而自娛樂爲波羅柰國作華會時彼會中遣於一人
詣林採波羅柰華作鬘時採華人還來會所路見世
尊相好光明普曜如百千日心懷歡喜前禮佛足以
所採華散佛而去還復上樹採華枝折墮死命終生

忉利天端正殊妙以波羅柰華而作宮殿帝釋問曰
汝於何處造修福業而來生此以本因緣具報帝釋
爾時帝釋以偈讚曰

身如真金色 照曜極鮮明 容顏貌端正

諸天中寔勝

爾時天子卽說偈答帝釋曰

我蒙佛恩德 散以波羅華 由是善因緣

今得是果報

爾時天子卽共帝釋來詣佛所佛爲說法心開意解
破二十億邪見業障得須陁洹果心懷欣慶卽於佛

前說偈讚佛

巍巍大世尊 寔上無有比 父母及師長

功德無有及 乾竭四大海 超越白骨山

閉塞三惡道 能開三善門

又禱寶藏經云爾時天女說偈曰

我咎以華鬘 奉迦葉佛塔 今生於天上

獲是勝功德 生在於天中 報得金色身

又薩婆多論云若四方僧地不得作塔爲佛法自爲

種植若僧和合者得不和合者不得作之若僧地有

種種華應淨人取次第與僧隨意供給不得私取自

撰述一
注疏本卷四十九
供養三寶若華多僧取不盡若僧和合聽隨意取之
若僧坊內不得起塔作像以近人臭穢不清淨故若
重閣舍若經像在下重不得在上住若塔地華不得
供養僧法正應供養佛此華亦得賣取錢以供養塔
用若屬塔水以供塔用設有殘若致功力是塔人
者應賣此水以錢屬塔不得餘用用則計錢犯若塔
內無人致水功力一由僧人殘水多少善好籌量用
之又文殊問經云爾時文殊師利白佛言世尊諸供
養餘華用治衆病其法云何佛告文殊華各別咒一
百八徧

誦佛華咒曰

南無佛闍寫治莎訶

般若波羅蜜華咒曰

那末柯盧履

民音切

般若波羅蜜多裏莎訶

佛足華咒曰

那莫波陀制點耽鹽莎訶

菩提樹華咒曰

南無菩提逼力龕嵐莎訶

轉法輪處華咒曰

南無達磨斫柯羅夜莎訶

塔華咒曰

那莫踰跋耶莎訶

菩薩華咒曰

南無菩提薩埵野莎訶

眾僧華咒曰

那莫僧伽野莎訶

佛像華咒曰

那莫波羅底耶莎訶

佛告文殊師利用此華若諸四眾能信修行應當早起清淨澡浴漱口念佛功德恭敬此華不以足踏及

跨華上如法執取安置淨器若人患寒熱額痛皆以冷水摩華以用塗身若吐利出血或腹內煩疼以漿飲摩華當服此華飲若口有瘡以暖水摩華含此華汁若天雨不止於空閑處以火燒華令雨即止若天亢旱在空閑處以華置水中復咒冷水更灑華上天即降雨若牛馬等本性不調以華飴之即便調伏若諸果樹華實不茂以冷水牛糞摩取華汁以灌其根不得踐踏華實即多若田中多水苗稼損減擣華為末以散田中即得滋長若國中疾病以冷水摩華塗蠡鼓等吹擊出聲聞者即愈若敵國怨賊欲來侵境

以水摩華在於彼處用灑散之即得退散若於高山
 有盤石處衆多比丘於石上摩華摩華既竟相與禮
 拜久後石上自生珍寶簡要畧述餘廣依經佛告文殊一一誦
 滿一百八徧此咒章句汝於處處當說如佛華法餘
 華亦爾又華嚴經云管人中有香名大象藏因龍鬪
 生若燒一丸與夫光明細雲覆上味如甘露七日七
 夜降香水雨若著身者身則金色若著衣服宮殿樓
 閣亦悉金色若有衆生得聞此七日七夜歡喜悅樂
 滅一切病無有橫枉遠離恐怖危害之心專向大慈
 普念衆生我知彼已而為說法令無量衆生得不退

轉又牛頭栴檀香從離垢山生若以塗身火不能燒
 也又百緣經云管佛在世時迦毗羅衛城中有一長
 者其家巨富財寶無量不可稱計生一男兒容貌端
 正世所希有身諸毛孔出栴檀香從其口出優鉢華
 香父母見已歡喜無量因為立字名栴檀香年漸長
 大求佛出家得阿羅漢果比丘見已而白佛言此栴
 檀香宿植何福生於豪族身口出香又值世尊出家
 得道佛告比丘乃往過去九十一劫毗婆尸佛入涅
 槃後時有王名槃頭末帝收其舍利造四寶塔高一
 由旬而供養之時有長者入佛塔中見地破落和泥

塗治以梅檀香全散其上發願而去緣是功德從是
 以來九十一劫不墮惡道天上人中身口常香受福
 快樂乃至今者遭值於我出家得道又大莊嚴論云
 佛言我昔曾聞迦葉佛時有一法師為眾說法於大
 眾中讚迦葉佛以是緣故命終生天於人天中常受
 快樂於釋迦文佛般涅槃後百年阿輸迦王時為大
 法師得阿羅漢常有妙香從其口出時彼法師去王
 不遠為眾說法口中香氣達於王所王聞香氣心生
 疑惑作是思惟彼比丘者為和妙香舍於口耶香氣
 乃爾作是念已語比丘言開口漱口猶有香氣比丘

白王何故語我張口漱口時王答言我聞香氣心生
 疑故使張口及以漱口香氣逾盛唯有此香口比丘
 餘無所有王語比丘願為我說比丘微笑即說偈言

天地自在者 今當為汝說 此非沈水香

復非華葉莖 梅檀等諸香 和合能出是

我生希有心 而作如是言 由昔讚迦葉

便獲如是香 彼佛時已合 與新香無異

晝夜恒有香 未曾有斷絕

又日雲經云香煙不盡放地得越棄罪盡五百歲墮
 糞屎地獄何以故由放恣心故又夜間經云莊嚴供

養具以口吹去灰者墮優鉢羅地獄傍報作風神王
 又要用竈經云鼻嗅香者由減香氣無其福德正報
 墮波頭摩地獄未來世鼻根無香味又曰供養經云
 供養香時口不合閉者墮黑糞屎地獄盡其半劫受
 罪得無信惠報何以故由起不氣空香故右三經雖無目錄並
感神報故別錄記也又三千威儀云燒香著佛前有三事一易
 中故香二當自出香三當布與人具香爐有三事一
 當先到去故火拾取中香聚一面二當拭令淨乃著
 火還取故香著中三火著時熾然不得吹令炭滅頌
 曰

久獸無明樹 方欣柰苑華 始入香山路

仍逢火宅車 慈父屢引接 幼子背恩賒

雖悟危藤鼠 終悲在篋虵 鹿苑禪林茂

鷲嶺動枝柯 定華發智果 乘空具度河

法雨時時落 香雲片片多 若為將羽化

來濟在塵羅

感應緣略引六驗

宋沙門求那跋摩

齊高士明僧紹

梁沙門釋惠釗

南齊晉安王蕭子懋

唐沙門釋惠主

唐雍州渭南山豹谷神香

兼出襍俗出香處

晉宋永嘉年中有外國三藏法師求那跋摩勅延祇
洹寺每於講說四眾雲會嘗夏安居竟信心看採襍
華施僧座下中竟檢視唯跋摩所坐鮮榮如初預知
死時依日先洗浴叉手誦經端坐而化身體香輒於
坐下得手迹遺文一卷其偈曰

摩羅婆國界阿蘭若寺中我初得聖果道迹離諸漏

若於師子國村名劫波利進修得三果是名斯陁舍
文帝淡加悅憺又於屍所見一物狀若龍虵長一疋
許直上昇天僧眾悲戀乃依外國法香薪闍維起塔

右一驗出
梁高僧傳

齊栖霞寺在南徐州瑯琊郡江乘北鄉頻佳里攝山
之中齊高士平原明僧紹以宋太始中起造嘗聞法
鐘自響山舍去村五六里宋昇明中村民平旦並見
半山有幡蓋羅列煙炎五色映照虛空男女瞻望皆
言是實競來觀視了無所見時有法度法師於山舍
講無量壽經中夜忽有金光照寺於其光中如有臺

館形像弘宣寺中僧衆及淨人等小不如法及白衣
賓客有穢濁入寺者虎卽出現吼叫巡房響振山谷
至今猶爾或有念誦小有疲懈山神現形又著烏衣
身長一丈手執繩索僧衆驚懼誦習不懈

梁南冥真寺在秣陵縣中興里普通五年沙門惠釗
起造惠釗生緣姓徐齊初隨舅在廬陵於路拾得一
襪襪中有繡帕帕裏有五色紙各爲一畧始開四重
都無所見末開窺下縫紙見光影如電晃曜一室因
此仍感神瑞入水不沒入火不然家人以爲發狂始
就籠檻關閉甚嚴俄而出外乃知神力因設虛座請

福空中有言曰我是長生菩薩應利益國土汝可依
佛法清淨供養於是競以香華貢奉每有靈驗南人
李叔獻結願乞本州後果爲交州刺史乃造沉香神
影世人以神重名華因號爲華娘神百姓送供闐噓
齋會所餘惠釗教化悉以起寺

右二驗出
梁京寺記

南齊晉安王蕭子懋字雲昌武帝之子也始年七歲
阮淑媛嘗病危篤請僧行道有獻蓮華供養佛者衆
僧以銅甕盛水浸其華莖欲令不萎如此三日而華
更鮮子懋涕泣禮佛誓曰若使阿姨因此勝利願佛
之力令華竟齋不萎七日齋畢華更鮮紅看視甕中

稍有根鬚母病尋差當代稱其孝感也子懋弟南海王子罕字靈華其母樂容華寢疾子罕晝夜禮拜于時以竹爲燈續其燈照曜訖夜極明此續經宿枝葉

茂盛母病尋愈

事出異史均春秋

唐始州永安縣釋惠生姓賈持律第一兼營福業後至故鄉南山藏伏唯食松葉異類禽獸同集無聲或有山神與送茯苓甘松香來六時行道一時不闕禽獸隨行禮佛誦經似如聽仰仍爲幽顯受菩薩戒後有羣猴共爲治道主曰汝性躁擾而作此何爲獼猴答言時君異也佛日通也主淡怪異畜生能言罕所

未有更有祥龍飛獸集持異香充塞山內後有八人採弓材者甚大驚駭便慰主曰聖君出世時號開皇矣至貞觀三年寺有明禪師清卓不羣白日獨坐見無半身向衆述曰吾與主律師建立此寺兩人同心忽失半身將主律師先去不耶至明日食時俗人驚云寺家設會耶見有四路客僧數千人入寺今何所在尋爾午時主便無疾而逝春秋八十有九唐雍州渭南縣南山倒豹谷崖有懸石文狀倒豹因以名焉谷有巖像於佛面亦號像谷古老傳云管有梵僧來云我聞此谷有像面山七佛龕管有七佛曾

來此谷說法澗內有蔭蔔華常所供養近至永徽年中南山龍池寺沙門智積聞之往尋至谷聞香莫知何所淡訝香氣從澗內沙出卽撥沙看形似茅根裹甲沙土然極芬馥就水抖擻洗之一澗皆香將還龍池佛堂中合堂皆香極深美氣山下俗人時見此山或如佛塔或全如佛面挺出空際故像頭之號非是虛立傍去嘉美谷甚近卽姚秦時王嘉所住也

右二驗出

唐高僧傳

○搜神記曰初鉤弋夫人有罪以譴死殯屍不臭而香○續搜神記曰合肥口有一大白船覆在水中漁

人夜宿其傍聞箏笛之音又香氣非常發相傳云曹公載妓船覆於此○異苑曰司州衛士度母常誦經長齋非道不行曾出自齋堂衆僧未食俱望見雲中有一物下旣落其前乃是大鉢滿中香飯舉座肅然一時敬禮母自分賦齋人皆七日不饑○述異記曰晉有人發廬山採松聞人語云此未可取此人尋聲而上見一異華形甚可愛其香非常知是神異因掇而服之得壽三百歲也○幽冥錄曰陳相子吳興烏程人始見佛家經遂學昇霞之術及在人間齋輒聞空中殊音妙香芬芳清越○許邁別傳曰邁少名喚

高平閭慶等皆就受業初慶等方去暎燒香皆五色煙出○佛圖澄傳曰澄以鉢盛水燒香咒之須臾生青蓮華○博物志曰西域使獻香漢制獻香不滿斤不得受西使臨去乃發香器如大豆者試著宮門香氣聞長安四面數十里中經日乃歇○扶南傳曰頓遜國人恒以香華事天神香有各種區撥葉華致華各遂率摩夷華又夏不衰日載數十車於市賣之燥乃益香亦可為粉以傅身體○述征記曰北荒有張母墓舊說是王氏妻葬有年載後開幕而香火猶然其家奉之稱清水道○世說曰桓車騎時有陳莊者

入武當山中學道所居有白煙香氣聞徹○麝香山海經曰翠山之陰多麝本艸經曰麝香味辛辟惡氣殺鬼精生中臺山○歲時香孫氏瑞應圖曰歲時者王禮備至則生本一日王者愛人命則生一名歲香○鬱金香周禮春官土鬱人曰鬱人掌裸古音器凡登禮賓客之裸和鬱鬯以實彝而陳之築鬱金煮之以和鬯酒也說文曰鬱鬯百艸之華遠方所貢芳物鬱人合而釀之以降神也○蘇合香續漢書曰大秦國合諸香煎其汁謂之蘇合廣志曰蘇合香出大秦國或云蘇合國國人採之笮其汁以為香膏乃賣其滓與賈客或

云合諸香艸煎為蘇合非自然一種物也傅子曰西國胡言蘇合香者獸所作也中國皆以為怪○鷄舌香吳時外國傳曰五馬州出鷄舌香續搜神記曰劉廣豫章人年少未婚至田舍見一女云我是何參軍女年十四而夭為西王母所養使與下土人交廣與之纏綿其日於席下得手中裹鷄舌香其母取巾燒之乃是火浣布南州異物志曰鷄舌香出杜薄州云是艸萎可合香口俞益期賤曰外國老胡說眾香共是一大木木華為鷄舌香也○雀頭香江表傳曰魏文帝遣使於吳求雀頭香○薰陸香魏略曰大秦出

薰陸南方艸物狀曰薰陸香出大秦國云在海邊自

有大樹生於沙中盛夏時樹膠流涉沙上夷人採取

賣與人南州異物志同其異者唯云狀如桃膠典術又同唯云如陶松脂法長飲食之令通神靈

俞益期賤曰眾香共是一木木膠為薰陸流黃香吳

時外國傳曰流黃香出都昆國在扶南南三千餘里

南州異物志同也廣志曰流黃香出南海邊國○青木香廣

志曰青木出交州徐哀南方記曰青木香出天篤國

不知形狀南州異物志曰青木香出天竺是艸根狀

如甘艸俞益期賤曰眾香共是一木木節是青木○

梅檀香竺法真登羅山疏曰梅檀出外國元嘉末僧

成藤於山見一大樹圓蔭數畝三丈餘圍辛芳酷烈其間枯條數尺援而刃之白梅檀也俞益期賤曰衆香共是一木木根爲梅檀○甘松香廣志曰甘松出涼州諸山○兜納香魏略曰出大秦國廣志曰兜納出西方艾納香廣志曰艾納香出對國樂府歌曰行胡從何來列國持何來攪攪毳毼五木香迷迭艾納及都梁○藿香廣志曰藿香出口南諸國吳時外國傳曰都昆在扶南出藿香南州異物志藿香出典遜海邊國也屬扶南香形如都梁可以著衣服中俞益期賤曰衆香共是一木木葉爲藿香○楓香南方記

曰楓香樹子如鴨卵爆乾可燒魏武令曰房室不潔聽得燒楓膠及蕙艸棧香廣志曰棧香出口南諸國○木蜜香異物志曰木蜜香名曰香樹生千歲根本甚大先伐僵之四五歲乃往看歲乃往看歲月久樹根惡者腐敗唯中節堅貞芬香獨在耳廣志曰木蜜出交州及西方本艸經曰木香一名蜜香味辛溫○稗香南方艸物狀曰稗香莖生烏澣○都梁香廣志曰都梁出淮南○沉香異苑曰沙門支法存住廣州有八尺氍毹又有沉香八尺板牀太元中王漢爲州大兒劭求二物不得乃殺而藉焉南州異物志曰木

香出日南欲取當先斫壞樹著地積久外自朽爛其
心至堅者置水則沉名曰沉香其次在心白之間不
其堅精置之水中不沉不浮與水平者名曰棧香其
竄小麤白者名曰槧香顧徵廣州記曰新興縣悉是
沉香如同心艸土人所之經年朽爛盡心則爲沉香
俞益期棧曰衆香共是一本木心爲沉香○甲香廣
志曰甲香出南方范曄和香方曰甲前剪棧香是也
○迷迭香魏略曰大秦出迷迭廣志曰迷迭出西海
中○苓陵香南越志曰苓陵香土人謂爲鷓艸芸香
天戴禮夏小正月採芸爲廟菜禮記月令曰仲冬之

月芸始生

鄭玄曰芸香艸也

說文曰芸艸似首宿淮南說芸

可以死而復生○

蘭香周易繫辭曰同心之言其臭

如蘭

王弼曰蘭芳也

易通卦驗曰冬至廣莫風至蘭始生說

文曰蘭香艸也本艸經曰蘭艸一名水香久服益氣
輕身不老○槐香出蒙楚之間故稽合述槐香賦序
兜末香漢武故事曰西王母當降上燒兜末香兜末
香者兜渠國所獻如大豆塗門香聞百里關中嘗大
疫死者相係燒此香死者止反生香真人關尹傳曰
老子曰真人遊時各各坐蓮華之上華徑十丈有反
生靈香送風聞三十里○神香十州記曰天漢三年

西國王使獻靈膠吉炎裒神香使者香起天殘之死
疾後元年長安城內大病死者日百數帝試取月支
神香燒之於城內其死未三日皆活芳氣經三月不
歇帝使祕錄餘後一旦失之○驚精香十州記曰聚
日洲在西海中上多真仙靈館宮第北門有大樹與
楓木相似而芳香聞數百里名爲反魂樹扣樹能有
聲如牛吟聞者駭振伐其根心於玉谷中煮取汁更
微煎令可丸名曰驚精香或名震靈又名反生香或
名人鳥精或名卻死香香聞數百里死屍在地聞氣
仍活

頌讚第三十四之一

述意部

夫褒述之志寄在詠歌之文詠歌之文依乎聲響故
詠歌巧則褒述之志申聲響妙則詠歌之文暢言辭
待聲相資之理也尋西方之有頌猶東國之有讚讚
者從文以結章頌者短偈以流頌比其事義名異實
同是故經言以微妙音聲歌讚於佛德斯之謂也管
釋尊入定琴歌震於石室婆提颺頌清響激於淨居
覺世至音固無得而稱矣至于末代修習極有明驗
是以陳思精想感漁山之梵唱帛橋誓願通大士之

妙音籥練勤行受法韻於幽祇文宣勵誠發夢響於齋室並能寫氣天宮摹聲淨刹抑揚辭契吐納節之斯亦神應之顯徵學者之明範也原夫經音爲懿妙出自然製用可修而研響非習蓋所以炳發道聲移易俗聽當使清而不弱雄而不猛流而不越凝而不滯趣發祇驚之風韻結霄漢之氣遠聽則汪洋以峻雅近屬則縱容以和肅此其大致也經稱淡遠雷音其在茲乎若夫稱講聯齋衆集永久夜緩晚遲香消燭揄睡蓋覆其六情懶結纏其四體於是擇妙響以昇座選勝聲以啓軸宮商唄發動玉振金反折四飛

哀悅七衆同迦陵之聲等神鸞之響能使寐魂更開
惰情還肅滿堂驚耳列席歡心當爾時乃知經聲之
爲貴矣

引證部

如長阿含經云其有音聲五種清淨乃名梵聲何等
爲五一者其音正直二者其音和雅三者其音清徹
四者其音深滿五者周徧遠聞具此五者乃名梵音
又梵摩喻經云如來說法聲有八種一最妙聲二易
了聲三柔輒聲四和調聲五尊惠聲六不誤聲七深
妙聲八不女聲言不漏闕無得其短者又十誦律云

爲諸天聞唄心喜故開唄聲也又毗尼母經云佛告諸比丘聽汝等唄唄者言說之辭雖聽言說未知說何等法佛言從修多羅乃至優婆提舍隨意所說十二部經復有疑心若欲次第說文衆大文多恐生疲獸若略撰集好辭直示現義不知如何以是因緣具白世尊佛卽聽諸比丘引經中要言妙辭直顯其義爾時有一比丘去佛不遠立高聲作歌音誦經佛聞不聽用此音誦經有五過患同外道歌音說法一不名自持二不稱聽衆三諸天不悅四語不正難解五語不巧故義亦難解是名五種過患又賢愚經云答

佛在世時波斯匿王與兵衆至祇洹邊過聞一比丘唄聲雅好軍衆立聽無有狀足象馬豎耳住不肯行王與軍衆卽入寺看見唄比丘形貌矬短醜陋極盛王不忍看王卽問佛今此比丘宿作何業得斯果報佛告王曰乃往過去有佛出世號曰迦葉入涅槃後機里毗王收其舍利欲用起塔有四龍王化作人形來到王所問起塔事爲用寶作爲用土耶王卽答言欲令塔大無多寶物今欲土作令方五里高二十五里龍白王言我是龍王故來相問若用寶作我當佐助王聞歡喜龍復語王四城門外有四泉水東門泉

水取用作鑿變成瑠璃南門泉水取用作鑿變成黃金西門泉水取用作鑿變成白銀北門泉水取用作鑿變成白玉王聞是語倍增歡喜卽立四監各典一廂其三監者作工欲成一監懈怠怠工獨不就王行看見以理訶責其人懷怨而白王言此塔太大當何時成王勅作人晝夜勤作一時都訖塔極高峻衆寶莊嚴極有異觀其監見已歡喜踊躍懺悔前過持一金鈴著塔撐頭發其願言令我所生音聲極好一切衆生莫不樂聞將來有佛號釋迦牟尼使我得見度脫生死緣於往昔嫌塔大故生恒醜陋由持金鈴懸塔

撐頭及願見佛從是以來五百世中極好音聲今復值佛出家修道得阿羅漢果以是因緣一切衆生見他作福不應毀咎後得惡報悔無所及也

讚歎部

如菩薩本行經云佛告阿難我念往昔有一如來出現於世號曰弗沙多陀阿伽度阿羅訶三藐三佛時彼佛在禰實窟內我見彼佛心生歡喜合十指掌翹於一腳七日七夜而將此偈讚歎彼佛而說偈言

天上天下無如佛

十方世界亦無比

世間所有我盡見

一切無有如佛者

阿難我以此偈歎彼佛已發如是願乃至彼佛語侍
者言是人過於九十四劫當得作佛號釋迦牟尼我
於彼時得授記已不捨精進增長功德無量世中作
梵釋天轉輪聖王以是善業因緣力故我得四種辯
才具足無有一人能與我論降伏我者我得成阿耨
菩提乃至轉於無上法輪又涅槃經云時迦葉菩薩
卽於佛前以偈讚佛

憐愍世間大醫王

身及智慧俱寂靜

無我法中有真我

是故敬禮無上尊

發心畢竟二不別

如是二心先心難

自未得度先度他

是故我禮初發心

又寶性論偈云

我今悉歸命

一切無上尊

爲開法王藏

廣利諸羣生

佛體無前際

及無中間際

亦復無後際

寂靜自覺知

旣自覺知已

覺他令他覺

是故爲彼說

無畏常恒道

佛智慈悲力

能執金剛杵

摧破諸見山

故我今敬禮

不可思量法

非聞慧境界

出離言語道

內心智清涼

彼真妙法日

清淨無塵垢

大智慧光明

普照諸世間

能破諸障障 覺觀貪瞋癡 一切煩惱等

故我今敬禮 以能知於彼 自性清淨心

見煩惱無實 故離諸煩惱 無障淨智慧

如實見眾生 自性清淨心 佛法身境界

無礙淨智眼 見諸眾生性 徧無量境界

故我今敬禮

又發菩提心論論主讚佛偈云

敬禮無邊際 去來現在佛 等空不動智

救世大悲尊

吾師天中天兩行偈

出普曜經

云何得長壽兩行偈

出涅槃經

日明經

如來妙色身兩行偈

出勝鬘經

處世界如虛空兩行偈

出

大慈哀愍羣生

為廕蓋盲冥者

開無目使視睇

化未聞以道明

處世界如虛空

猶蓮華不著水

心清淨超於彼

稽首禮無上尊

述曰漢地流行好為刪略所以處眾作唄多為半偈故毗尼母論云不得作半唄得突吉羅罪然此梵唄文辭未審依如西方出何典誥答但聖開作唄依經讚偈取用無妨然關內關外吳蜀唄辭各隨所好唄

撰述
法苑珠林卷四十九
讚多種但漢梵既殊音韻不可互用至於宋朝有康僧會法師本康居國人博學辯才譯出經典又善梵音傳泥洹唄聲製哀雅擅美於世音聲之學咸取則焉又晉時有道安法師集製三科上經上講布薩等先賢立制不墜於地天下法則人皆習行又至魏時陳思王曹植字子建魏武帝第四子也幼合珪璋十歲屬文下筆便成初不改定世間術藝無不畢善邯鄲淳見而駭服稱爲天人植每讀佛經輒流連嗟翫以爲至道之宗極也遂製轉讚七聲升降曲折之響世之諷誦咸憲章焉嘗遊魚山忽聞空中梵天之

響清雅哀婉其聲動心獨聽良久而侍御皆聞植淡感神理彌悟法應乃摹其聲節寫爲梵唄撰文製音傳爲後式梵聲顯世始於此焉其所傳唄凡有六契法苑珠林卷第四十九

校譌

第十三紙

二行材北
藏作林

第十五紙

六行祿下宋
南藏有事字

第十

七紙

十二行
字十二行其堅之

第十八紙

二行
其疑當作甚

蘭上北藏
有弼字

第二十一紙

六行其宋南藏作取
二十行恒南藏作短

音釋

闡

他達切

稟

以制切

跨

苦化切

擣

都皓切

蠡

盧戈切

劍

蚌屬切

之遙切襍房玉切躁則到切不切若匹切對匹切穉呼郭切

穉其俱切穉穉毛也穉疏鳩切穉他蓋切穉都騰切穉呼郭切

木生也穉穉穉比萌切穉火五切穉許厚切穉牛鳴也穉補刀切穉切

摹莫胡切揄託蓋切矧才何切告將此切

刑部員外郎金壇干玉立施贊刻此吳江北丘明覽對真

法苑珠林第四十九卷萬曆辛卯秋清涼山如德庵識

法苑珠林卷第五十

唐上都西明寺沙門釋道世玄暉撰

頌讚篇第三十四之餘

音樂部

如百緣經云佛在世時王舍城中豪富長者各相率合設大節會作諸妓樂而自娛樂時有舞師夫婦二人從南來將一美女字青蓮華端正殊妙世所希有聰明智慧難可酬對婦女所有六十四藝皆悉備知善解舞法迴轉俯仰曲得節解作是唱言今此城中頗有能舞如我者不明解經論能問答不時人答曰

有佛世尊在迦蘭陀竹林善能問答使汝無疑舞女
聞已尋將諸人共相隨逐且歌且舞到竹林中見佛
世尊猶故僑慢放逸戲笑不敬如來爾時世尊見其
如是卽以神力變此舞女如百年老母髮白面皺牙
齒踈闕俯僂而行行而舞女自觀其身形狀極老而
作是言今此女身以何因緣卒有如是衰相現耶今
者必是佛之威神使我故爾遂於佛前淡心慚愧唯
願世尊當見無怒爾時世尊知此舞女心已調伏以
神通力變身如前大衆見此舞女卒老卒壯無有常
定各生厭離解悟無常心開意解有得四沙門果者

有發無上菩提心者時彼舞女及其父母卽於佛前
求索出家佛卽告言善來比丘尼頭髮自落法服着
身成比丘尼精勤修習得阿羅漢果諸天世人所見
敬仰時諸大衆見是事已請說因緣佛告大衆乃往
過去無量世時波羅柰國王有太子字孫陁利入山
學道獲五神通見緊那羅女端正殊妙狀如諸天作
諸姿態且歌且舞鼓動我心望使染著退失仙道我
於彼時心遂堅固無有欲想語彼女言一切有爲無
有常定我今觀汝形體臭穢充滿其中薄皮覆上不
可久保正是當有髮白面皺俯僂而行汝今何爲僑

慢放恣乃至如是向者歌聲其音已變何故在此作
諸姿態於是緊那羅女聞是語已尋向仙人懺悔罪
咎因發願言使我來世得斷生死我於汝邊獲得道
果佛告大衆欲知彼時王子學仙道者則我身是彼
緊那羅女者今青蓮華比丘尼是由於彼時發願力
故今值我出家得道比丘聞已歡喜奉行又百緣經
云佛在世時迦毗羅衛城中有一長者財寶無量不
可稱計其婦生男端正殊妙世所希有年漸長大有
好音聲令衆樂聞值佛出家得阿羅漢果諸比丘等
請佛爲說得道因緣佛告比丘乃往過去九十一劫

有佛出世號毗婆尸入涅槃後有國王名槃頭末帝
收取舍利造四寶塔高一由旬而供養之時有一人
見此塔故心懷歡喜便作音樂以遶供養發願而去
緣是功德九十一劫不墮三塗天上人中常好音聲
令衆樂聞乃至今者遭值於我出家得道比丘聞已
歡喜奉行又百緣經云昔佛在世時舍衛城中有諸
人民各自莊嚴作唱妓樂出城遊戲至城門中遇值
佛僧入城乞食諸人見佛歡喜禮拜卽作妓樂供養
佛僧發願而去佛卽微笑語阿難言此諸人等由作
妓樂供養佛僧緣此功德於未來世一百劫中不墮

惡道天上人中最受快樂過百劫後成辟支佛皆同一號名曰妙聲以是因緣若人作樂供養三寶所得功德無量無邊不可思議故法華經偈云

若使人作樂

擊鼓吹角貝

簫笛琴箏篪

琵琶鏡銅鈸

如是衆妙音

盡持以供養

皆已成佛道

又菩薩處胎經云緊那羅住須彌山北過小鐵圍有大黑山亦在十寶山間無有佛法日月星辰由管布施之力今居七寶宮殿壽命甚長此王本人中有大長者興造佛塔此緊那羅施一刹柱成辦寺廟復以

淨食施於工匠壽盡作曾臆神在兩山間先在人中爲大長者居財無量有一沙門乞食婦擊飯施之乃大瞋怒云何乞人瞻視我婦當令此人手腳斷壞壽終以後受此醜形八十四劫常無手足諸天讌會皆悉與乾闥婆分番上下天欲奏樂而其腋下汗流便自上天有一緊那羅名頭婁磨琴歌諸法實相以讚世尊時須彌山及諸林樹皆悉震動迦葉在座不能自安五百仙人心生狂醉失其神足又大樹緊那羅王所問經云爾時大樹緊那羅王以已所彈璠璠之琴閻浮檀金華葉莊嚴善淨業報之所造作在如來

前善自調琴及餘八萬四千妓樂是大樹王當彈此
琴鼓衆樂時其音普皆聞此三千大千世界是琴音
聲及妙歌聲隱蔽欲界諸天音樂所有諸山藥艸叢
林悉皆徧動如人極醉前卻顛倒須彌峽岷峨涌沒不
定一切凡聖唯除菩薩不退轉者其餘一切聞是琴
聲及諸樂音各不自安從座起舞一切聲聞放舍威
儀誕貌逸樂如小兒舞戲不能自持爾時天冠菩薩
語是聲聞大迦葉等汝諸大德已離煩惱得八解脫
云何今者各捨威儀如彼小兒舉身動舞於時大德
諸聲聞等答言善男子我於是中不得自在如旋嵐

大風吹諸樹木彼無有力能自安持非彼本心之所
欲樂爾時天冠菩薩語大迦葉汝今觀是不退菩薩
威德勢力誰見如是而當不發無上正眞菩提道心
琴聲威力皆說法音八千菩薩得無生忍頌曰

玄亮吐清氣

神響徹幽聾

登臺發春詠

高興希避縱

乘虛感靈覺

漁山振思童

摹寫天歌梵

冀布法音同

忘高故不下

颯颯數仞中

比丘歌聲唄

人畜振心鍾

斯由暢玄句

卽感鴈遊空

神期發筌悟

豁爾自靈通

感應緣

畧引
六驗

晉沙門帛法橋

晉沙門支曇籥

齊沙門釋僧辯

齊沙門釋曇憑

齊有仕人姓梁

唐刺史任義方

晉中山有帛法橋是中山人少樂轉讀而稍乏聲每以不暢爲慨於是絕粒懺悔七日七夕稽首觀音以祈現報同學苦諫誓而不改至第七日覺喉內豁然

卽索水洗漱云吾有應矣於是作三契經聲徹三里許遠近驚嗟人畜悉來觀聽爾後誦經五十萬言晝夜諷詠哀婉通神至年九十聲猶不變以晉穆帝永和年中卒於河北卽石虎末世也

晉有支曇籥本月支人寓居建業少出家精苦蔬食憇吳虎丘山晉孝武初勅請出都止建初寺孝武從受五戒敬以師禮籥特稟妙聲善於轉讀嘗夢天神授其聲法覺因裁製新梵響清美四飛卻轉反折還弄雖復東阿先變康會後造始終循還未有如籥之妙後進傳寫莫匪其法所製六言梵唄傳響于今後

終於所住年八十一

齊安樂寺有釋僧辯姓吳建康人出家止安樂寺少好讀經哀婉折衷獨步齊初無人如之嘗在新亭劉紹宅齊辯初夜讀經始得一契忽有羣鶴下集階前及辯度一卷一時飛去由是聲振天下遠近知名後來學者莫不宗事永明七年二月十九日司徒竟陵文宣王夢於佛前詠維摩一契因聲發而寤卽起至佛堂前還如夢中法更詠古維摩一契便覺音韻流好有工恒曰明且卽集京師善聲沙門僧辯等次第作聲辯傳古維摩一契瑞應七言偈一契竄是命家

之作後人時有傳者並訛失大體辯以齊永明十一年卒

齊白馬寺有釋曇憑姓楊捷爲南安人少遊京師學轉讚止白馬寺音調甚工而過且自任時人未之推也於是專精規矩更加研尋晚遂出郡翕然改觀誦三本起經尤善其聲後還蜀止龍淵寺已漢懷音者皆崇其聲範每梵音一吐輒象馬悲鳴行途住足因製造銅鐘於未來常有八音四辯庸蜀有銅鐘始於此也後終所住吳景帝世烏程民有得固病及差能以響言響言者於此而聞彼然自所聽之不覺其聲

之大也自遠聽之如人對言不覺聲之自遠來也聲之所往隨其所向遠者不過十數里

右此四驗出梁高僧傳

北齊時有仕人姓梁甚豪富將死謂其妻子曰吾平生所愛奴馬及皆使用日久稱人意吾死以為殉不然無所乘也及死家人以囊盛土壓奴殺之馬猶未殺奴死四日而蘇說云當不覺去忽至官府門門人因留止在門所經一宿明旦見其主被鎖兵守衛入官所見奴謂曰我謂死人得使奴婢故遺言喚汝今各自受其苦全不相關今當白官放汝言畢而入奴從屏外闚之見官問守衛人曰昨日壓脂多少乎

對曰得八斗官曰更將去壓取一斛六斗主則被壓牽出竟不得言明旦又來有善色謂奴曰今當為汝白也又入官問得脂乎對曰不得官問何以主司曰此人死三日家人為請僧設會每聞經唄聲鐵梁輒折故不得也官曰且將去主司白官請官放奴即喚放俱出門主遣傳語其妻子曰賴汝等追福獲免大苦然由未脫更能造經像以相救濟冀因得免自今無設祭既不得食而益吾罪言畢而別奴遂重生而具言之家中果以其日設會於是傾家追福合門練

行右一驗出冥報拾遺記

唐括州刺史樂安任義方武德年中死經數日而蘇
自云被引見閻羅王王令人引示地獄之處所說與
佛經不殊又云地下晝夜昏暗如霧中行于時其家
以義方心上少有溫氣遂卽請僧行道義方乃於地
下聞其讚唄之聲王檢其案謂之吏曰未合卽死何
因錯追遂放令歸義方出度三關關吏皆睡送人云
但尋唄聲當卽到舍見一大坑當道意欲跳過遂落
坑中應時卽起論說地獄盡地成圖其所得俸祿皆
造經像曾寫金剛般若千餘部義方自說右一山出冥
報拾遺

敬塔篇第三十五之一

述意部

敬惟如來應現妙色顯於三千正覺韜允遺形傳於
八萬是以塔踊靈山影留石窟剋檀畫氎之儀鑄金
鏤玉之狀全身碎身之迹聚塔散塔之奇而允曜重
昏福資含識致使英聲遐美邪徒結信肇啓育王之
始終傳有唐之初自歷代繁興神化非一故經曰正
法住正法滅意存茲乎

引證部

如觀佛三昧經云佛畱影石室在耶乾呵羅國毒龍
池側佛坐龍石室窟中爲龍作十八變踊身入石猶

如明鏡在於石內映現於外遠望則見近望不現諸天百千供養佛佛影亦說法

迄今不滅待至彌勒

又集經云忉

利天城東照明園中有佛髮塔城南麤澀園中有佛衣塔城西歡喜園中有佛鉢塔城北駕御園中有佛

牙塔又智度論云天帝釋取菩薩髮及衣於天上城

東門外立佛髮塔衣塔又有玉傳云王得信心問道

人曰我從來殺害不必以理今修何善得免斯殃答

曰唯有起塔供養眾僧救諸徒囚賑濟貧乏

故譬喻經云王

宮內常以四車供養二萬沙門盡心被禮不可具述

王曰何處可起塔道人即

以神力左手掩日允作八萬四千道散照閻浮提所

照之處皆可起塔今諸塔處是也時王欲建舍利將

四部兵眾至王舍城取阿闍世王佛塔中舍利還復

修治此塔與先無異如是更取七佛塔中舍利至眾

摩村中時諸龍王將王入龍宮中王從龍索舍利供

養龍即分與之時王作八萬四千金銀瑠璃玻瓈篋

盛佛舍利又作八萬四千寶瓶以盛此篋又作無量

百千幡幢傘蓋使諸鬼神各持舍利供養之具勅諸

鬼神言於閻浮提至於海際城邑聚落滿一億家者

為世尊立塔時有國名奢叉尸羅有三十六億家彼

國人語鬼神言可三十六篋舍利與我等起立佛塔

王作方便國中人士少者令分與彼令滿家數而立爲塔時巴連弗邑有上座名曰耶舍王詣彼所白上座曰我欲一日之中立八萬四千佛塔徧此閻浮提意願如是時彼上座白言善哉大王尅後十五日日正食時令此閻浮提一時起諸佛塔如是依數乃至一日之中立八萬四千塔世間人民興慶無量共號曰阿育王塔又大阿育王經云八國共分舍利阿闍世王分數得八萬四千又別得佛口髭還國道中逢難頭禾龍王從其求舍利分阿闍世王不與便語言我是龍王力能壞汝國土阿闍世王怖畏卽以佛髭與

之龍還於須彌山下高八萬四千里於下起水精塔阿闍世王得還國以紫金函盛舍利作千歲燈火於五恒河沙水中塔藏埋之後阿育王得其國土王娶夫人身長八尺髮亦同等衆相具足王令相師觀之師言當爲王生金色之子王卽拜爲第二夫人後還有娠足滿十月王有緣事宜出外行王大皇后妬嫉便作方便共欲除之慕覓猪母卽應產者語第二夫人言卿是少甫爾始產不可露面視天以被覆面卽生金色之子光照宮中盜持兒去殺之卽以猪子著其身邊便罵言汝云當爲王生金色之子何故生猪

便取輪頭拍囚內後園中令服菜王還聞之不悅久
久之後王出行園見之憶念迎取歸宮第二夫人漸
得親近具說情狀王聞驚怪卽殺八萬四千夫人阿
育王後於城外造立地獄治諸罪人佛知王殺諸夫
人應墮地獄卽遣消散比丘化王王發信悟問比丘
言殺八萬四千夫人罪可得贖不道人言各爲人起
一塔塔下著一舍利當得脫罪耳王卽尋覓阿闍世
王舍利有國相父年百二十將五百人取本舍利王
得大喜卽分與鬼神各還所部令一日一時同戴八
萬四千刹諸鬼神言多隔山障不得相知王言汝曹

但還治繫護刹安鈴我當使阿脩輪以手摸日四天
下亦同時震又阿育王經云塔成造千二百織成旛
及襍華未得懸旛王身崩沒塔成已六日王請僧至
園供養時有優波崛多羅漢將一萬八千阿羅漢受
王請尊者崛多顏貌端正身體柔輒而王體醜陋肌
膚麤澀尊者卽說偈言

我行布施時 淨心好財物 不如王行施
以沙施於佛

王告大臣我以沙施佛報獲如是云何而不修敬於
世尊王後尋佛弟子迦葉阿難等所有佛在世時弟

子塔廟躬到塔所具展哀情責心修敬各興種種供養更立大塔各捨十萬兩珍寶供養是塔次至薄拘羅塔應當供養王問彼有何功德崛多尊者答曰彼無病第一乃至不爲人說一句法寂默無言王曰以一錢供養諸臣白王言功德既等何故於此供養一錢王告之曰聽吾所說偈

雖除無明癡

智慧能鑒察

雖有薄拘羅

於世何所益

時彼一錢還來至王所時大臣輩見是希有事異口同音讚彼嗚呼尊者少欲知足乃至不須一錢王及

供養菩提樹不絕夫人名曰低舍羅締多作念王極愛念於我念王今捨我珍寶至菩提樹間我方便殺樹令死王不得往可得與我相娛夫人卽遣人以熱乳澆之樹枯葉落王聞是語迷悶躡地夫人見王憂愁不樂當悅王心白王曰若無彼樹我命亦無如來於彼樹得道彼樹旣無何用活耶復以冷乳灌之彼樹更生王聞歡喜詣於樹下目不暫捨以千甕香湯漑灌菩提樹倍復嚴好增長茂盛後王潔淨身心手執香鑪在於殿上向西方作禮心念口言如來賢聖弟子在諸方者憐愍我故受我供養如是語時有三

撰述
法苑珠林卷第三
十萬比丘悉來集彼大眾中十萬是阿羅漢二十萬是學人及凡夫宮人太子羣臣共王所作功德無量不可述盡又雜阿含經云阿育王問比丘言誰於佛法中能行大施諸比丘言給孤獨長者最行大施王問彼施幾許比丘答曰以捨億千金王聞已彼長者尚能捨億千金我今爲王何緣復以億千金施當以億百千金施乃至用私藏盡將此閻浮提夫人姝女太子大臣總施與聖僧後用四十億金還復贖取如是計校總用九十六億千金乃至王得重病自知命盡常願以億百千金作功德今願不滿便就後世唯

減四億未滿王卽辦諸珍寶送與雞頭摩寺乃至以半阿摩勒果送與僧禮拜僧足問訊大聖衆等我領此閻浮提是我所有今者頓盡不得自在唯此半果哀愍納受令我得福上座耶舍令研磨著石槌羹中行之一切皆得周徧王復問傍臣曰誰是閻浮提王諸臣啓王言大王是也時王從卧起而坐顧望四方合掌作禮念諸佛功德心念口言我今復以此閻浮提施與三寶時王書紙上而封緘之以齒印印之作如是事畢卽便無常爾時太子及諸人民興種種供養葬送如王之法而闍維之又法益經云爾時諸大

臣言今是大地屬於三寶云何而立太子爲王諸臣
語已共議出四億金送與寺中將贖其地又善見論
云阿育王以金錢九十六億起八萬四千寶塔復大
種種布施

興造部

述曰上來所引經論興置所由其已知乎然未識塔
義是何復有幾種所爲之人復通凡不答曰梵漢不
同翻譯前後致有多名文有訛正所云塔者或云塔
婆此云方墳或云支提翻爲滅惡生善處或云斗藪
波此云護讚若人讚歎擁護歎者西梵正音名爲窣

堵波此云廟廟者貌也卽是靈廟也安塔有其三意
一表人勝二令他信三爲報恩若是凡夫比丘有德
望者亦得起塔餘者不合若立支提有其四種一生
處二得道處三轉法輪處四涅槃處諸佛生處及得
道處此二定有支提生必在阿輪柯樹下此云無憂
樹此是夫人生太子之處卽號此樹爲生處支提如
來得道在於菩提樹下卽呼此樹下爲得道支提如
來轉法輪及涅槃處此二無定初轉法輪爲五比丘
在於鹿苑縱廣各二十五尋一尋八尺古人身大故
一尋八尺合二十丈今天竺人處處多立轉法輪取

一好處而依此量豎三柱安三輪表佛咎日三轉法輪相卽名此處爲轉法輪支提如來入涅槃處安置舍利卽名此處爲涅槃支提現今立寺名涅槃寺此則爲定若據舍利處處起塔則爲不定此四亦名宰堵波又毗婆沙論云若人起大塔如來生處轉法輪處若人取小石爲塔其福等前大塔所爲尊故若爲如來大梵起大塔或起小塔以所爲同故其福無量又阿含經云有四種人應起塔一如來二辟支佛三聲聞四輪王又十二因緣經云有八人得起塔一如來二菩薩三緣覺四羅漢五阿那含六斯陀舍七須

陀洹八輪王若輪王已下起塔安一露槃見之不得禮以非聖塔故初果二露槃乃至如來安八露槃八槃已上並是佛塔又僧祇律云初起僧伽藍時先規度好地將作塔處不得在南不得在西應在東應在北不侵佛地僧地應在西在南作僧房佛塔高顯處作不得塔院內沆染曬衣啞地得爲佛塔四面作龕作師子鳥獸種種綵畫內懸幡蓋得爲佛塔四面造種園林華果是出華應供養塔若樹檀越自種檀越言是中華供養佛果與僧食佛言應從檀越語若華多者得與華鬘家語言爾許華作鬘與我餘者與

撰述
法苑珠林卷五十一
我爾許直若得直得用然燈買香以供養佛兼得治塔若直多者得置佛無盡物中若人言佛無貪怒癡但自莊嚴用是華果而受樂者得罪報重佛言亦得作支提有舍利者名塔無舍利者名支提如佛生處得道處轉法輪處佛泥洹處菩薩像辟支佛像佛腳跡處此諸支提得安佛華蓋供養若供養中上者供養佛塔下者供養支提若率風雨來應收供養具隨近安之不得言我是上座我是阿練若乞食大德等得越毗尼罪若塔僧物賊來急時不得藏舉佛物應莊嚴佛像僧座具應敷安置種種飲食令賊見相若

起慈心賊問比丘莫畏出來年少應看若賊卒至不得藏物者應言一切行無常作是語已捨去是名難法

感福部

如小未曾有經云佛告阿難若有一人盡四天下滿中艸木皆悉爲人得四道果及辟支佛盡壽四事供養所須具足至滅度後一一起塔香華幢幡寶蓋供養復造帝釋大莊嚴殿用八萬四千寶柱八萬四千寶窻八萬四千天井寶窻八萬四千樓櫺館閣四出圍遶衆寶校飾若有善男子善女人作如上百千億

大莊嚴殿用施四方僧其福雖多然不如有人於佛
般涅槃後以如芥子舍利起塔大如庵摩勒果其刹
如針上施槃蓋如酸棗葉若佛形像如麩麥大勝前
功德滿足百倍不及一千倍萬倍百千萬倍所不能
及不可稱量阿難當知如來無量功德戒分定分智
慧分解脫分知見解脫分無量功德有大神通變化
及六波羅蜜如是等無量功德又無上依經云阿難
向佛合掌而作是言我於今日入王舍乞食見一大
重閣莊嚴新成內外宛密若有清信人布施四方僧
并具四事若如來滅後取佛舍利如芥子大安立塔

中起塔如阿摩羅子大戴刹如針大露槃如棗葉大
造佛如麥子大此二功德何者爲勝佛告阿難如滿
四天下四果聖人及辟支佛如甘蔗林竹荻麻田等
若有一人盡壽供養四事具足及入涅槃後悉起大
塔供養然燈燒香衣服幢幡等阿難於意云何是人
功德多不阿難言甚多世尊阿難且置又如帝釋天
宮住處有大飛閣各常勝殿種種寶裝各八萬四千
若有清信男子女人造作如是常勝寶殿百千拘胝
施與四方衆僧若復有人如來般涅槃後取舍利如
芥子大造塔如阿摩羅子大戴刹如針大露盤如棗

葉大造佛形像如麥子大此功德勝前所說百分不及一千萬億分乃至阿僧祇數分所不及一及譬喻所不及何以故如來無量功德故縱碎娑婆世界未爲微塵以此次第悉是四沙門果及辟支佛若有清信男女盡形供養及以滅後起塔供養亦不如取舍利如芥子大乃至造像如麥子大此功德前所說百分千萬億分不及一分乃至筭數譬喻所不能及如是阿難一切如來皆在因地知衆生界自性清淨客塵煩惱之所汙濁然不入衆生清淨界中能爲一切衆生說深妙法除煩惱障不應生下劣心以大量故

於諸衆生尊重心起大師敬起般若起闍那起大悲依此五法菩薩得入阿鞞跋致位此云不退依如證大方便得阿耨菩提又涅槃經云若於佛法僧供養一香燈乃至獻一華則生不動國善守佛僧物塗掃佛僧地造像塔如母指常生歡喜心亦生不動國此卽淨土常嚴不爲三災所動也又僧祇律云佛於拘薩羅國遊行時婆羅門耕地見世尊過持牛杖柱地禮佛世尊見已便發微笑諸比丘白佛何因緣故笑唯願欲聞佛告諸比丘是婆羅門今禮二佛諸比丘白言何等二佛佛告比丘禮我杖下有迦葉佛塔諸比

丘白佛願見迦葉佛塔佛告諸比丘汝從此婆羅門索土塊并是地即便索之時婆羅門便與之得已爾時世尊即現出迦葉佛七寶塔高一由延其面廣半由延婆羅門見已便白佛言我姓迦葉是我迦葉土埠爾時世尊即於彼處作迦葉佛塔諸比丘白佛我得授泥不佛言得授即說偈言

真金百千擔 持用行布施 不如一團泥

敬心治佛塔

爾時世尊敬過去佛故便自作禮諸比丘亦禮佛說偈言

人等百千金 持用行布施 不如一善心

恭敬禮佛塔

爾時比丘即持香華來奉世尊敬過去佛故即持供養塔佛即說偈言

百千車真金 持用行布施 不如一善心

香華供養塔

爾時大眾雲集佛告舍利弗汝為諸人說法佛說偈言

百千閻浮提 滿中真金施 不如一法施

隨順令修行

爾時座中有得道者佛說偈言

百千世界中 滿中真金施 不如一法施

隨順見真諦

又法句喻經云昔佛在世時遣一羅漢名曰須曼持佛髮爪至罽賓國南山之中造佛塔寺中常有五百羅漢旦夕燒香遶塔禮拜時山中有五百獼猴見僧遶塔禮拜供養卽共負石學僧作塔遶之禮拜于時天雨山水瀑漲五百獼猴一時沒死生初利天七寶宮殿巍巍無量衣食自然快樂無極旣得生天各自念言我等何緣得來生此卽以天眼觀見前身作其

獼猴由學衆僧戲笑作塔山水所漂命終生此卽共相將齋持香華從天下來供養死屍迴詣佛所禮拜問訊佛爲說法五百天子一時皆得須陀洹果旣得果已還歸天上獼猴學僧戲笑作塔尚獲福報巍巍乃爾豈況於人信心造塔寧無果報又譬喻經云昔佛涅槃後阿育王國有迦羅越其人福德世間希有意有所須應念卽至其家舍宅七寶所成閣內婦女端正少雙晝夜娛樂快樂無極其人信心恒常供養二萬餘僧阿育王聞便召見之而語之言聞卿大富家有何物卽答王言家無所有王不信之便遣人看

使至唯見門閣七重舍宅堂宇七寶莊嚴巍巍無量
使入室中不見餘物唯見婦女端正少雙使見卽還
具以白王王意漸解時迦羅越知王解已便於王前
以手東指卽時空中七寶雨下不可限量指餘三方
亦復如是王見乃知是大福德王卽詣寺請問此事
寺有上座得阿羅漢三明六通王問上座此迦羅越
宿植何福所須自然應念卽至上座答王乃往過去
九十一劫毗婆尸佛入涅槃後迦羅越爾時與其四
人同共造塔用心徧殷造塔成已復以七寶及取好
花上塔頭上四面散下而以供養發誓願言使我世

世食福自然恒不斷絕緣是功德從是以來九十一
劫不墮惡道天上人中食福自然快樂無極爾時但
願食福無盡不願度脫故至今日唯受勝福未得道
迹又大悲經云佛告阿難若人樂著三有果報於佛
福田若行布施餘諸善根願我世世莫入涅槃以此
善根不入涅槃無有是處是人雖不樂求涅槃然於
佛所種諸善根我說是人必入涅槃也又百緣經云
昔佛在世時舍衛城中有一長者其家巨富財寶無
量不可稱計生一男兒端正殊妙世所希有其兒兩
手各把金錢取已還生無有窮盡父母歡喜因爲立

字名曰寶手年漸長大慈悲孝順好喜布施有人來乞申其兩手出好金錢尋以施之後與諸人出城遊觀前到祇洹見佛相好心懷歡喜頂禮請佛及比丘僧願受我供阿難語言設供須財於是寶手卽申兩手金錢雨落須臾滿地積聚過人佛勅阿難令爲營供飯食訖佛爲說法得須臾洹歸辭父母求乞出家旣出家已得阿羅漢果阿難見已而白佛言寶手比丘宿植何福生於豪族手出金錢取無窮盡又值世尊出家得道佛告阿難昔迦葉佛入涅槃後有迦翅王收其舍利造四寶塔時有長者見豎塔根心生隨

喜持一金錢安著塔下發願而去緣是功德不墮惡道天上人中常有金錢受福快樂乃至今者遭值於我出家得道又百緣經云佛在世時迦毗羅衛城中有一長者財寶無量其婦懷妊生一男兒容貌端正世所希有然其生時頂上自然有摩尼寶蓋徧覆城上父母歡喜因爲立字名曰寶蓋漸長值佛出家得羅漢果佛告比丘乃往過去九十一劫有佛出世號毗婆尸遷神入涅槃後有國王名槃頭末帝收取舍利造四寶塔高一由旬而供養之時有商主入海採寶安隱得來卽以摩尼寶珠蓋其塔頭發願而去緣

是功德九十一劫不墮惡趣天上人中常有寶蓋隨
共而生乃至今者得值於我出家獲道聞佛所說歡
喜奉行又百緣經云佛在世時迦毗羅衛城中有一
長者財寶無量不可稱計其婦生一男兒端正殊妙
世所希有頭上自然有摩尼珠時父母因爲立字名
曰寶珠年漸長大見佛出家成阿羅漢果入城乞食
時寶珠故在頭上城中人民怪其所以競來看之淡
自慚恥還歸所止白言世尊我此頭上有此寶珠不
能去今者乞食爲人嗤笑願佛世尊見却此珠佛
告比丘汝但語珠我今生分已盡更不須汝如是三

說珠自當去比丘受教寶珠不現時諸比丘請佛爲
說宿業因緣佛告比丘乃往過去九十一劫有佛出
世號毗婆尸入涅槃後時彼國王名槃頭末帝收其
舍利造四寶塔高一由旬而供養之時彼國王入塔
禮拜持一摩尼寶珠繫著髮頭發願而去緣是功德
九十一劫不墮三塗天上人中常有寶珠在其頂上
受天快樂至今值佛出家得阿羅漢果比丘聞已歡
喜奉行

旋遶部

如菩薩本行經云管佛在世時佛與阿難入舍衛城

而行乞食時彼城中有一婆羅門從外而來見佛出城光相巍巍時婆羅門歡喜踊躍遶佛一币作禮而去佛便微笑告阿難言此婆羅門見佛歡喜以清淨心遶佛一币以此功德從是以後二十五劫不墮惡道天上人中快樂無極竟二十五劫得辟支佛名持儼那祇梨以是因緣若人旋佛及旋佛塔所生之處得福無量也又提謂經云長者提謂白佛言散華燒香然燈禮拜是爲供養旋塔得何等福佛言旋塔有五福德一後世得端正好色二得聲音好三得生天上四得生王侯家五得泥洹道何因緣得端正好色

由見佛像歡喜故何緣得聲音好由旋塔說經故何緣得生天上由當旋塔時意不犯戒故何緣得生王侯家由頭面禮佛足故何緣得泥洹道由有餘福故佛言旋塔有三法一足舉時當念足舉二足下時當念足下三不得左右顧視唾寺中地左遶者經律之中制令右旋若左遶行爲神所訶乃至右遶麥積爲俗所責其徒衆矣今時行事者順於天時面西北轉右肩袒膊向佛而恭也或旋百币十币七币三币各有所表且論常行三币者表供養三尊止三毒淨三業滅三惡道得值三寶故華嚴經偈云

始欲旋塔 當願衆生 施行福祐

究暢道意 遶塔三市 當願衆生

得一向意 不續四毒

又賢者五戒經云旋塔三市者表敬三尊一佛二法
三僧亦念滅三毒一貪二瞋三癡又三千威儀云遶
塔有五事一低頭視地二不得蹈蟲三不得左右顧
視四不得唾塔前地上五不得中住與人語

法苑珠林卷第五十

校譌

第十四紙五行周北 第十九紙十七行擔 第二十

二紙十六行訖下
宋南有已字


音釋

皺側救切 儻隴主切 峴峴普火切 岷岷語可 殉辭

死也 賑之切 髭即移切 漑居代切 麩古猛切

蔗之夜切 嗤笑也 脹除庚切 麩麥也

敘縣居士吳惟明施賢刻此
法苑珠林第五十卷 吳江比丘明覺對 眞州
王國英書 溧水尚 鵬刻
萬曆辛卯秋 清涼山妙德庵識



法苑珠林卷第五十一

唐上都西明寺沙門釋道世玄憚撰

敬塔篇第三十五之餘

故塔部

依像法決疑經云造新不如修故作福不如避禍斯
 言驗矣或有村坊塔寺損故伽藍堂殿朽壞舍屋崩
 摧席扇蓬戶靡隔煙塵甕牖茅茨無掩霜露是以門
 墻彫毀糞穢盈階路絕人蹤僧徒漂寄不修不飾日
 就衰羸造罪造憊無時暫捨夜暗燈燭本自無聞晝
 日旛華元來非見堂絕梵唄鑪停海岸遂使惡鬼効

靈善神捨衛伽藍無固直爲僧徒慢惰佛法旣衰亦由白衣無敬此而不憂更欲何求又寶梁經云有一賢者面上有國王文相師見已嫁女與之後時賢者入僧寺中杖倚伽藍生憍慢故失國王文墮大地獄又薩遮經云或嫌塔寺及諸形像妨礙送置餘處者如是惡人攝在惡逆衆生分中上品治之又十輪經云若破寺殺害比丘其人壽終支節皆疼多日不語死墮阿鼻地獄具受諸苦又三千威儀云掃塔上有五事一不得著履上二不得背佛掃塔三不得取上善土持下棄四不當下佛像上故華五當旦過澡手

自持淨巾還拭佛像復有五事一當先灑地二當使調三當待燥四不逆掃五不得逆風掃復有五事一不得去善土二當自手拾艸三當取中土轉著下處

四不得令四角掃處有迹五掃塔前六步使淨

此處事務

故限約六步若事開豫多掃彌謹也

又正法念經云若有衆生淨心供

養衆僧掃如來塔命終生意躒天身無骨肉亦無汗垢香氣能熏一百由旬其身淨潔猶如明鏡又正法念經云若有衆生識於福田見有佛塔風雨所壞若僧房舍以福德心塗飾治補復教他人令治故塔命終生白身天其身鮮白入珊瑚林諸天女五欲自娛

業盡還退若生人中其身鮮白又禰寶藏經云若掃
 僧房一閭浮提不如掃佛塔一手掌成論又撰集百
 緣經云掃地得五功德一自除心垢二除他垢三去
 憍慢四調伏心五增長功德得生善處又無垢清淨
 女問經云掃地得五功德一自心清淨他人見生淨
 心二為他愛三天心歡喜四集端正業五命終生善
 道天中又沙彌威儀經云掃地有五法一不得背人
 二不得逆掃三當令淨四不得有迹五當即分却又
 增一經云掃佛塔有五法一水灑地二除去瓦石三
 平正其地四端意掃地五除去穢惡地既淨已隨能

持一枝香華散布地上供養得福無量故華嚴偈云

散華莊嚴淨炎明

莊嚴妙華以為帳

散眾襍華徧十方

供養一切諸如來

又百緣經云管佛在世時與諸比丘到恒河邊見一
 故塔毀落崩壞比丘問佛此是何塔朽故乃爾佛告
 比丘此賢劫中波羅奈國梵摩達王正法治化唯無
 子息禱祀諸神求索有子因不能得時王國中有一
 池水生一蓮華其華臺中有一童子結跏趺坐有三
 十二相八十種好口出優鉢羅華香身諸毛孔出梅
 檀香王及妃后見甚歡喜即抱還宮養育漸大隨其

行處蓮華承足因香立字名梅檀香後悟非常成辟
支佛身昇虛空作十八變尋入涅槃王收舍利起塔
供養是彼塔耳比丘問佛宿植何福受斯果報佛告
比丘乃往過去拘樓孫佛時有長者子甚好姪色見
一姪女心生耽著無財可與遂至塔中盜華與之乃
共夜宿曉卽身體生其惡瘡痛不可言喚醫療治醫
占云須牛頭梅檀用塗瘡上可得除愈時長者子卽
賣家宅得於金錢滿六十萬尋用買香正得六兩擬
用塗瘡心自思惟卽語醫言我今所患乃是心病卽
持所買牛頭梅檀擣以爲末入其塔中發誓願言如

來往管修諸苦行誓度衆生隨其厄難我今此身隨
一生數唯願世尊慈悲憐愍除我此患作是誓已用
香塗塔以償華價至心供養求哀懺悔瘡尋得差身
諸毛孔有梅檀香聞此香已歡喜禮拜發願而去緣
是功德不墮惡道天上人中常受快樂隨其行處蓮
華承足身諸毛孔恒有香氣是故智者當作是學又
小法滅盡經云後劫火起時曾作伽藍所不爲火焚
乃至金剛界爲土臺也又菩薩本行經云管佛在世
時告五百阿羅漢汝等各說前世宿行所作功德今
得值我得道因緣時有阿羅漢名婆竭多梨卽從座

起白佛言世尊我念過去無央數劫有佛出世號曰
定光入涅槃後分布舍利起塔供養法欲末時有一
貧人無方自濟賣薪爲業向澤採薪遙見澤中有一
塔寺甚爲巍巍卽到塔邊瞻觀形像歡喜作禮唯見
狐狼飛鳥走獸止宿之處艸木荆棘不淨滿中迴絕
無人復無行跡無供養者貧人覩見心用愴然而不
曉知如來神德但以歡喜誅伐艸木掃除不淨掃訖
歡喜遶之八帀作禮而去緣此功德命終之後生光
音天衆寶宮殿光明晃煜於諸天中巍巍最勝不可
計量盡其天壽而復百返作轉輪王七寶自然王四

天下後復壽盡常住國王大姓長者家財富無量顏
容端正殊妙無雙人見歡喜無不愛敬欲行之時道
路自淨虛空之中雨散衆華婆竭多言管貧人者今
我身是由管掃塔生處自然一阿僧祇九十劫中不
墮惡道天上人間富貴尊榮封受自然快樂無極今
最後身值釋迦佛捨豪出家得阿羅漢三明六通具
八解脫若有人能於佛法僧少作微善如毛髮許所
生之處受報弘大無有窮盡又譬喻經說祇陀太子
管毗婆尸佛時布施一奴一婢給掃寺廟緣此功德
世世常得七寶宮宅門戶兩邊常有自然金銀男女

撰述
五百餘騎衛護其舍無敢近者輪王七寶者一金輪
寶二白象寶三紺馬寶四神珠寶五玉女寶六主藏
臣寶七主兵神寶又禰寶藏經云管舍衛國中有一
長者造立塔寺後時命終生忉利天其婦晝夜追憶
夫故愁憂苦惱以憶夫故常掃治夫所造塔寺夫下
觀見卽來婦所問訊安慰而語之言汝憶我故大憂
愁耶婦卽語言汝爲是誰夫尋答言我是汝夫以作
塔寺功德因緣得生天上見汝憶我修治塔寺故來
汝所婦言近我夫卽答言人身臭穢不復可近汝復

欲得爲我妻者勤供佛僧修掃塔寺願生我天若得
生天我必當還以汝爲妻婦用夫語作諸功德發願
生天其後命終得生天上還爲夫婦夫婦相將來至
佛所佛爲說法夫婦並得須陀洹果旣得果已還歸
天上又分別功德論云昔舍衛城中有夫婦二人而
無子息夫婦精進信敬三寶時婦早亡由信敬故生
忉利天以爲天女面首端正天中少比天女自念我
極端正今此世間誰任我夫便以天眼觀見本夫今
已出家年老暗短專信而已常勤掃除塔廟爲業見
其掃塔必應生天天女尋下光明照耀住其夫前比

丘見已問其因緣天女答曰我是君婦今爲天女我
觀天上無任我夫見君精進常勤掃塔必應生天若
得生天願同一處還爲我夫是以故來陳其情狀白
意已訖還歸天上時夫比丘見此事已從是以後倍
加精進修補塔廟積功轉勝應生第四兜率天上天
女憶夫復來語言君福轉勝應生兜率天我今不復
得君爲夫語訖還去比丘聞已倍更精進遂獲得阿
羅漢果三明六通具八解脫又百緣經云佛在世時
迦毗羅城中有一長者財寶無量其婦生一兒端正
殊妙見者敬仰漸大見佛得阿羅漢果爾時世尊告

諸比丘乃往過去九十一劫有毗婆尸佛入涅槃後
有王名槃頭末帝收取舍利造四寶塔而供養之其
後小毀有童子入塔見此破處和顏悅色集喚眾人
共塗治塔發願而去緣是功德九十一劫不墮地獄
畜生餓鬼天上人中受樂無極常爲天人所見敬仰
乃至今值於我爲諸人所見敬仰出家得道聞佛所
說歡喜奉行頌曰

遺身八萬塔

寶飾高百丈

儀鳳異靈鳥

金盤代仙掌

積拱承彫肉

高簷掛樹綱

寶地若池沙

風鈴如積響

刻削生千變

丹青圖萬像 煙霞時出沒 神仙乍來往

晨霧半層生 飛幡接雲上 遊蛺不敢息

翔鷗詎能仰 聖變無窮端 感福豈三兩

願假舟航末 彼岸誰云廣

感應緣 略引上十一驗

西晉會稽鄞縣塔

東晉金陵長干塔

石趙青州東城塔

姚秦河東蒲坂塔

周岐州岐山南塔

周瓜州城東古塔

周沙州城內大乘寺塔

周洛州故都西塔

周涼州姑臧故塔

周甘州刪丹縣故塔

周晉州霍山南塔

齊代州城東古塔

隋益州福感寺塔

隋益州晉源縣塔

隋鄭州超化寺塔

隋懷州妙樂寺塔

隋并州淨明寺塔

隋并州榆社縣塔

隋魏州臨黃縣塔

統明神州山川并海東塔

襟明西域所造之塔

右以前數內十九塔並是如來在日行化乞食因遇童子戲弄沙土以爲米麵宿祐冥會以土麵施佛佛感其善心爲受塗壁記此童子吾滅度後一百年滿作王出世號爲阿育

作鐵輪王王閻浮提一切鬼神並皆臣屬且使空中地下四十里內所有鬼神開往前八塔所獲舍利役諸鬼神於一日一夜一億家施一塔廣計八萬四千塔具如上經故不備載今惟此神州卽是東境故此漢地案諸典籍尋訪有十九塔並是育王所造八萬四千之數也若更具引佛法東流已來道俗所造感通者則有百千且述育王十九塔內逐要感徵并同見聞者略述者二十一條餘之不盡者備如廣傳也

初西晉會稽鄞縣塔寺今在越州東三百七十里鄞縣界東去海四十里在縣東南七十里南去吳村二十五里案前傳云晉太康二年有并州離石人劉薩訶者生在田家弋獵爲業得病死甦云見一梵僧語訶曰汝罪重應入地獄吾憫汝無識且放今洛下齊城丹陽會稽並有古塔及浮江石像悉阿育王所造可勤求禮懺得免此苦既醒之後改革前習出家學道更名慧達如言南行至會稽海畔山澤處處求覓莫識基緒達悲塞煩寃投造無地忽於中夜聞土下鐘聲卽遷記其處刺木爲刹三日間忽有寶塔及舍

利從地涌出靈塔相狀青色似石而非石高一尺四寸方七寸五層露槃似西域于闐所造面開窓子四周天全中懸銅磬每有鐘聲疑此磬也遶塔身上並是諸佛菩薩金剛聖僧禱類等像狀極微細瞬目注睛乃有百千像現面目手足咸具備焉斯可謂神功聖迹非人智所及也今在大木塔內於八王日輦巡邑里見者莫不下拜念佛生善齋戒終身其舍利者在木塔底其塔左側多有古迹塔側諸暨縣越舊都之地也以句章鄞鄞剡等四縣爲之諸暨東北一百七里大部鄉有古越城周迴三里地記云越之中葉

撰述
在此爲都驪宮別館遺基尚在悉生豫樟多在門階
之側行位相當森竦可愛風雨晦朔猶聞鐘磬之聲
百姓至今多懷肅敬其迹繁矣輿志云阿育釋迦弟
子能役鬼神一日夜於天下造佛骨寶塔八萬四千
皆從地出

案晉沙門竺慧達云東方兩塔一在於此一在彭城
今秣陵長干又是其一則有三矣今以經驗億家造
一塔計此東夏理多不疑且見揚越卽有二塔廣統
九域故有隱之會稽記云東晉丞相王導云初過江
時有道人神來不凡言從海來相造管與育王共遊

鄮縣下真舍利起塔鎮之育王與諸真人捧塔飛行
虛空入海諸弟子攀別一時俱墮化爲烏石石猶人
形其塔在鐵圍山也太守楮府君云海行者述島上
有聚烏石作道人形頗有衣服楮今鑿取將視之石
文悉如袈裟之狀梁祖普通三年重其古迹建木浮
圖堂殿房廊周環備滿號阿育王寺四面山繞林竹
葱翠華卉間發飛走相娛實開放者之佳地也有碑
頌之著作郎顧胤祖文寺東南三里山上有佛右足
跡寺東北三里山頭有佛左足跡二所現于石上莫
測其先寺北二里有聖井其實淡池中有鰻鱓魚俗

號爲魚菩薩也人至井所禮拜魚隨聲出至隋末賊
過僞禮魚現賊便以刀斫之因斷魚尾自爾潛隱雖
喚不出時有至心邀請禮拜者但瀆水而已初有一
僧聞塔來禮處所荒涼將食爲難有老姥患腳來爲
造食便去日日如是怪之去後私尋乃入池內校量
卽是池魚所化也其塔靈異往往不一大略爲瑞多
現聖僧遶塔行道每夕然燈於炎影中現形在壁旋
轉而行且列數條多則詞費至唐貞觀十九年敏法
師者寓穴道勝歷覽聖迹依然動神領徒數百來寺
一月敷講經論士俗咸會夜中有人見梵僧百餘繞

塔行道以事告衆寺僧曰此事常有不足可怪自古
至今四大良日遠近來寺建齋樹福然於夜中每見
梵僧行道誦經贊唄等相唐永徽元年會稽處士張
太玄於寺禮誦沙門智悅獨與太玄連牀而寢半夜
聞誦金剛般若了了分明二人靜聽形心欣泰乃至
誦訖殺契其相若真尋視無形明知神授也西京城
內東西曲池日嚴寺寺卽隋煬帝造管在晉蕃作鎮
淮海京寺有塔未安舍利乃發長干寺塔下取之入
京埋于日嚴寺塔下施銘於上于時江南大德五十
餘人咸言京師塔下舍利非是育王造塔舍利育王

舍利乃在長干本寺道俗懷疑不測是非至武德七年日嚴寺廢僧徒散配其舍利塔無人守護時有道宣律師門徒十人配住西市南長壽坊崇義寺乃發掘塔下得舍利三枚白色光明大如黍米并爪一枚少有黃色并白髮數十餘有襍寶瑠璃古器等總以大銅函盛之檢無螺髮又疑爪黃而小如人者尋佛倍人爪赤銅色今則不爾乃將至崇義寺佛堂西南塔下依舊以大石函盛之本銘覆上理于地府南僧咸曰此爪髮至梁武帝時已有疑焉據事以量則長干佛骨頗移於帝里矣然江南古塔猶有神異崇義

所流蓋篋如也故兩述之但年歲綿遠後人莫測其源故別流記爾

此下關青州河東二驗

周西京西扶風故縣在歧山南古塔在平原上南下北高鄉曰鳳泉周魏以前寺名阿育王僧徒五百及周滅佛法廟宇破壞唯有兩堂至大業末年四方賊起百姓共築此城以防外寇唐初禰住失火焚之一切都盡二堂餘燼焦黑尚存至貞觀五年岐州刺史張亮素有信向來寺禮拜但見故塔基曾無上覆奏勅請望雲宮殿以蓋塔基下詔許之古老傳云此塔一開經四十年一出示人令道俗生善恐開聚眾不

敢私開奏勅許開濶一丈餘獲二古碑並周魏之所
樹也既出舍利徧視道俗有一盲人積年目冥努眼
直視忽然明淨京邑內外奔赴塔所目有數萬舍利
高出見者不同或見如玉白炷映徹內外或見綠色
或見佛形像或見菩薩聖僧或見赤炷或見五色襍
炷或有全不見者問其本末爲一生已來多造重罪
有善友人教使徹到懺悔或有燒頭煉指刺血灑地
殷重至誠遂得見之種種不同不可備錄至顯慶四
年九月內有山僧智琮慧辯以解咒術見追入內語
及育王塔事年歲久遠須假弘護帝曰豈非童子施

土之育王耶若近有之則八萬四千之一塔矣琮曰
未詳虛實請更出之帝曰能得舍利濶是善因可前
至塔所七日行道祈請有瑞乃可開發卽給錢五千
貫絹五千匹以充供養琮與給使王長信等十月五
日從京旦發六日逼夜方到琮卽入塔內專精苦到
行道久之未驗至十日三更乃臂上安炭火燒香懺
厲專注曾無異想忽聞塔內像下振裂之聲尋聲往
觀乃見瑞炷流溢霏霏上涌塔內三像足下各放炷
明赤白綠色旋遶而上至於衡角合成帳蓋琮大喜
踊躍欲召僧看乃覩塔內側塞僧徒合掌而立謂是

撰述
同寺須臾既久炆蓋漸歇冉冉而下去地三尺不見
羣僧方知聖隱勅使王長信等同覩瑞相流燭徧滿
赫奕瀾漫若有旋轉久方沒盡及旦看之獲舍利一
枚殊大於粒炆明鮮潔更細尋視又獲七粒總置盤
木一枚獨轉遠餘七粒各放炆明炫耀人目琮等以
所感瑞具狀上聞勅使常侍王君德等送絹三千匹
令造朕等身阿育王像餘者修補故塔仍以像在塔
內可卽開發出佛舍利以流福慧又勅僧智琮慧辯
馮臚給名住會昌寺初開舍利二十餘人同共下鑿
及獲舍利諸人並見唯一人不見其人懊惱自拔頭

髮苦心邀請乃置舍利於掌雖覺其重不見如初由
是諸人恐不見骨不敢覩炆寺東雲龍坊人勅使未
至前數日望寺塔上有赤色炆周照遠近或見如虹
直上至天或見炆照寺城丹赤如晝且具以聞寺僧
歎訝曰舍利不久應開此瑞如貞觀不異其舍利形
狀如食指初骨長可二寸內孔正方外楞亦爾下平
上漸內外炆淨以指內孔恰得受指便得勝載以示
大衆至於炆相變現不可常準于時京邑内外道俗
連接二百里間往來相續皆稱佛德一代炆華京師
慈恩寺僧惠滿在塔行道忽見綺井覆海下一雙眼

精光明殊大通召道俗同視亦皆懾然喪膽更不重
視至顯慶五年春三月下勅請舍利往東都入內供
養時西域又獻佛束頂骨至京師人或見者高五寸
闊四寸許黃紫色又追京師僧七人往東都入內行
道勅以舍利及頂骨出示行道僧曰此佛真身僧等
可頂戴供養經一宿還收入內皇后捨所寢衣帳准
價千匹絹爲舍利造金棺銀槨雕鏤竅奇以龍朔二
年送還本塔至二月十五日京師諸僧與塔寺僧及
官人等無數千人共下舍利于石室掩之俟三十年
後非余所知至後開瑞冀補茲處歧州岐山縣華陽

鄉王莊村有人姓馮名玄嗣先來麤獷殊不信敬母
兄承舍利從東都來將欲藏掩嗣不許往母兄不用
其語至舍利所禮拜還家玄嗣怒曰此有何驗而往
禮之若舍利有功德者我家中佛像亦有功德卽取
佛像燒之竟有何驗母兄救之已燒下半玄嗣忽倒
不覺暴死經三日始活說云忽到一處似是地獄有
大鳥飛來喙精噉舌入大火坑燒烙困苦覺身癢悶
以手摩面眉髮隨落目看大地全無精光親屬俯看
皆知罪驗諸人語曰汝自造罪無可代者玄嗣神識
不與人同但曰火燒我心以取道士之語教吾不信

撰述
卷五十一
誦佛之罪今殃著身東西馳走又被打杖怕懼號哭
但惟叩頭彈指懺悔乞命乞命而晝夜號走不曾暫
住至二月十三日親屬哀懇請僧懺悔乞願造像又
將至塔所于時京邑大德極多時行虔法師爲衆說
法裴尚宮比丘尼等數百俗人士女向有萬人咸見
玄嗣五體投地對舍利前號哭自撲至誠懺悔不信
之罪又懺犯尼淨行打罵衆僧盜食僧果自懺已後
眠夢稍安大患仍自不差未經一年方死其佛頂骨
用珍寶贖之計直四千匹絹遂依其數以蕃練酬之
頂骨今見在內供養卽是螺髻束髮小頂骨然大頂

骨猶未至此

此下關州沙州洛州涼州甘州晉州代州七驗

隋益州郭下福感寺塔者在州郭下城西本名大石
相傳云是鬼神奉育王教西山取大石爲塔舍利
在其中故名大石也隋蜀王秀作鎮井終聞之令人
掘鑿全是一石尋縫至泉不見其際風雨暴至有人
於石傍鑿取一片將出乃是鑿玉問於識寶商云此
是真鑿玉世中希有隋初有詵律師見此古迹於上
起九級木浮圖今見在焉益州旱澇官人祈雨必於
此塔祈卽有應特奇感徵故名福感寺近有人盜鈴
將下三級有神擎爐斗起以壓賊胔內中其人被壓

樸述
唱呼寺爲射斗起方得脫出至永徽元年有王顏子者漂掠有名夜上相輪取博山將下至底級兩柱忽夾之求出不得漸漸急困見有梵僧曰可大唱賊不爾死矣卽唱數聲寺僧聞救方得拔出至貞觀年初大地震動此塔搖颺將欲摧倒于時郭下無數人來忽見四神形如塔量各以背抵塔之四面乍倚乍傾率以免壞觀瑞道俗歎未曾有塔上露盤猶來小短不稱塔形有一人極豪侈多產業見前靈瑞乃捨金三百兩共諸信者更造露盤旣成枿下至覆盆香氣蓬勃如雲騰涌流芳城邑七日乃歇

隋益州晉源塔者在州西南一百餘里今號爲等泉寺本名大石其基本緣略亦同前尋諸古塔其相不同豈非當部鬼神情有所樂案蜀三塔同一石蓋餘不定准也州北百里雒縣塔者在縣城北郭下寶興寺中本名石基相亦同前隋初有天竺僧曇摩掘又遠至東夏禮育王塔承蜀三塔又往禮拜至雒縣大石寺塔所敬事已訖欲往成都宿兩女驛將旦聞左右行動聲又曰是何人耶妄相恐動空中應曰有二神王從本國來所在之處擁護法師明日當見成都塔今欲西還與師別耳又曰旣能遠送何不見形

神卽見形又爲人善畫便一一邈之旣徧形隱及至成都禮大石塔訖誦律師乃依圖刻木爲十二神像粧飾在於塔下今猶見在益州郭下法成寺有沙門道卓是名僧也大業初維縣寺無人修葺纔有下基卓乃率化四部造木浮圖粧飾備矣塔爲龍護居在西南角井中時有相現側有三池莫知深淺三龍居之人莫臨視貞觀十三年三龍大鬪雷霆震擊水火交飛久之乃靜塔如本住人皆拾得龍毛長三尺許黃赤可愛

隋鄭州超化寺塔者在州西南百餘里密縣界在縣

東南十五里塔在寺東南角其北連寺方十五步許其寺塔基在淖泥之上西面有五六泉南面亦有皆孔方三尺騰涌沸出流溢成川泉上皆下安栢柱鋪在泥水上以炭沙石灰次而重填窰上以大方石可如八尺牀編次鋪之四面細腰長一尺五寸深五寸生鐵固之近有人試發一石下有石灰乃至百團便抽一團長三丈徑四尺現在自非輪王表塔神功所爲何能辦此基構終古不見其儔也今於上架塔二重塔南大泉涌沸鼓怒絕無水聲豈非神化所致也有幽州僧道巖者姓李氏形極奇偉本入隋煬四道

場後從俗服今年一百五歲獨住溪山每年七日來
此塔上盡力供養嚴怪其泉流涌注無聲乃遣善水
崑崙入泉尋討但見石柱羅列不測其際中有寶塔
可高三尺獨立空中四面水圍凝然而住竟不至塔
所考其原始莫測其由時俗所傳育王所立隋祖已
來寺塔現在

隋懷州妙樂寺塔者在州東武陟縣西七里妙樂寺
中見有五級白浮圖塔方可十五步並是側石編砌
石長五尺闊三寸以下鱗次葺之極細密道俗自見
咸驚訝其神鬼所造其下不測其底古老相傳塔從

地涌出下有大水莫委真虛有刺史疑僧濫飾乃使
人傷基掘下至泉源猶不見其際

此下闕淨明
榆社二驗

隋魏州臨黃塔者在縣西三十里本名舍利寺今爲
尼住其塔見在三邊有水惟西開路基構編石從水
底上蓮華彌滿於三面其水際淡人皆怯入傳云舍
利塔在其水內空中如鄭州者今改爲冀州大都督
府

齊州臨濟縣東有甄塔云是誌公所營四面石獸擁
嵒驚人周滅法時令人百千用力挽出終不可脫亦
無有損今現在○益州城南空慧寺內金藏有穴在

寺近有道士素知有藏來就守寺神乞神令入穴取得二斗金粟依言卽入唯見地下金甕行行相對莫測其邊寺僧通知無敢侵者○坊州玉華宮寺南二十里許大高嶺俗號檀臺山上有古塔基甚宏壯面方四十三尺上有一層軛身四面開戶石門高七尺餘廣五尺餘傍有破甕無數古老傳云晉周文王於此遊獵見有沙門執錫持鉢山頭立住喚下不來王遣往捉將至不見遠看仍在乃勅掘所立處深三丈獲得鉢杖而已王重之爲聖故爲起軛塔一十三級左側村墟常聞鐘聲至龍朔元年京師大慈恩寺沙

門慧貴法師聞之便往又聞鐘聲慷慨古迹將事修理恨無泉水懷惑猶豫貴又感祥雲護塔善神曰可卽經始不勞疑慮又感異僧曰我是南方淨土菩薩行化至此云是塔自古至今已經四造勿辭勞倦功用必成唯須牢作不事華侈三層便止貴聞此告親事經營塔側古窰三十餘所猶有熟軛填滿更尋塔南川中乃是古寺背山面水一期幽栖之勝地也自未修前鐘聲時至恰今營構依時發聲三下長打如今集僧上堂方法龍朔三年掘得古銘云周保定年塔崩塌初成時南望見渭又云置塔經四百餘年崩

計周保定至開皇元年得二十年開皇至龍朔初得
八十一年又計銘記四百年後始崩則塔是後漢時
所造後周無諡文者前周大遙未知古老所傳周文
是何帝代但知塔輒巨萬終非下俗所立耳江州廬
山有三石梁長數十丈廣不及尺下望無底晉咸康
年中庾亮爲江州登山過梁見老公殊偉厦屋崇峻
玉堂眩目奇塔崇竦莫測是何循遠久之終非人宅
乃拜謝而返唐貞觀二十一年荊州大興國寺塔西
南柱無故有聲人往看之乃見有金銅佛頭出如是
日日漸出經三夕方盡長六寸許是立佛道俗咸異

之○高麗遼東城傍塔者古老傳云往晉高麗聖王
出現案行國界次至此城見五色雲覆地卽往雲中
有僧執錫住立旣至便滅遠看還見傍有土塔三重
上如覆釜不知是何更往覓僧唯有荒艸掘深一丈
得杖并履又掘得銘上有梵書侍臣識之云是佛塔
王委曲問答曰漢國有之彼名蒲圖王因生信起木
塔七重後佛始至具知始末今更增高本塔朽壞斯
則育王所統一閭浮洲處處立塔不足可怪倭國在
此洲外大海中距會稽萬餘里隋大業初彼國官人
會丞來此學問內外博知至唐貞觀五年共本國道

俗七人方還倭國未去之時京內大德每問彼國佛法之事因問阿育王依經所說佛入涅槃一百年後出世取佛八國舍利使諸鬼神一億家爲一佛塔造八萬四千塔徧閻浮洲彼國佛法晚至未知已前有阿育王塔不會丞答曰彼國文字不說無所承據然驗其靈迹則有所歸故彼土人開發土地往往得古塔靈盤佛諸儀相數放神允種種奇瑞詳此嘉應故知先有也

西域志云罽賓國廣崇佛教其都城內有寺名漢寺
晉日漢使向彼因立浮圖以石構成高百尺道俗虔

恭異於殊常寺中有佛頂骨亦有佛髮色青螺文以七寶裝之盛以金匣王都城西北有王寺寺內有釋迦菩薩幼年齟齬長一寸次其西南有王梵寺寺有金銅浮圖高百尺其浮圖中有舍利骨每以六齋日夜放光明照燭蓮承露盤至其達曙西域志云波斯匿王都城東百里大海邊有大塔塔中有小塔高一丈二尺裝衆寶飾之夜中每有光曜如火聚云佛般泥洹五百歲後龍樹菩薩入大海化龍王龍王以此寶塔奉獻龍樹龍樹受已將施此國王便起大塔以覆其上自晉以來有人求願者皆叩頭燒香獻華

蓋其華蓋從地自起徘徊漸上當塔直上乃止空中
經一宿變滅不知所在西域志云龍樹菩薩於波羅
柰國造塔七百所自餘凡聖造者無量直於禪連河
上建塔千有餘所五年一設無遮大會○西域乾陀
羅城東南七里有雀離浮圖推其本緣乃是如來在
世之時與諸弟子遊化此土指城東曰我入涅槃後
二百年有國王名迦尼色迦在此處起浮圖佛入涅
槃後二百年有國王字迦尼色迦出遊城東見四童
子壘牛糞爲塔可高三尺俄然卽失矣王怪此童子
卽作塔籠之糞塔漸高挺出於外去地四百尺然後

始定王更廣塔基三百餘步從地構木始得齊等上
有鐵根高三百尺金盤十三重合去地七百尺施功
旣訖糞塔如初在大塔南三百步時有婆羅門不信
是糞以手揆之遂作一孔年歲雖久糞猶不爛以香
泥填孔不可充滿今有天宮籠蓋之雀離浮圖自作
已來三爲天火所災國王修之還復如本父老云此
浮圖天火七燒佛法當滅塔內佛事悉是金玉千變
萬化難得而稱旭日始開則金盤是朗微風暫發則
寶鐸鏗鏘西域浮圖竄爲第一○雀離浮圖南五十
步有一石塔其形正直舉高二丈甚有神變能與世

人表作吉凶之徵以指觸之若吉者金鈴鳴應若凶者假令人搖亦不肯鳴宣律師住持感應傳云律師問四天王世尊舍利闍維始了舍利灰石當置幾塔天人龍鬼各得分不答曰人得八分天得三分龍得十二分灰石分六分鬼神得二分修羅得三分力士得一分汝等天人龍神慎勿起諍此是世尊教又問世尊僧伽梨當置何處鉢盂錫杖復置何處答曰世尊僧伽梨付囑堅疾天令善護持鉢盂錫杖付囑頻伽天隨在供養世尊僧伽梨先遣在祇洹十二年中住鉢盂在鷲頭山十五年中住錫杖在龍泉四十年

中住又問伽梨鉢杖等何故歷年住耶答曰佛告我言初度比丘尼損我正法又爲末世多惡比丘貯畜不淨物不受持三衣毀滅正法故令僧伽梨等六年住僧戒壇六年住尼戒壇令正法久住又問何故伽梨分爲二處住耶答曰亦爲末世惡比丘比丘尼等不受持衣多犯禁戒無有威德是故世尊令將僧伽梨六年住戒壇令招威德天人龍神敬佛意故不嫌比丘比丘尼伽梨六年住戒壇亦爲惡尼令修行八敬供養比丘勿起婬意修持淨行令諸鬼神敬順佛意日夜六時來至伽藍擁護尼衆故住六年又問何

故佛鉢在靈鷲山十五年住答曰世尊未涅槃前在鷲山精舍分析白毫光明以爲百千分畱一分光施末法弟子若持戒若破戒乃至天龍鬼神等於如來法中能作一念善者皆施此光明世尊初成道時四天王奉佛石鉢唯世尊得用餘人不能持用如來滅度後安鷲山與白毫光共爲利益於末法中當隨佛鉢於他方國施比丘食及以天龍等衆隨順佛意縱造非法終不見過又問何故十五年在鷲頭精舍答曰初住五年者欲表諸比丘令觀五陰得證三昧十年欲令解了諸法得百法門自此隨緣流行諸國乃

至法滅也又問何故錫杖在於龍窟中四十年住耶答曰爲護諸外道及伏煩惱惡龍破諸結使開悟大乘四諦法輪如來去世後四十年中有飛行羅刹能說毗尼藏及十二部經詐爲善比丘食諸持戒者日別四百爲斷此惡故鎮龍窟復令正法增住四百年復令像法增住千五百年復令末法增住二萬年爾時大梵天王來至世尊所白佛言如來初踰城至泐沙王國問樹神道樹神請佛至宮已白佛言我受此神身經二十大劫過去諸佛皆來至此我此宮中有過去諸佛四牙一千四塔我今請佛昔爲童子時齒

牙四枚請佛垂慈賜我四牙欲造塔供養佛卽許之
卽告阿難汝往父王所從彼典藏臣取我四牙阿難
依命卽取佛告樹神今畱一牙與汝供養汝可造塔
并寫我經教我令四弟子在塔入滅盡定守我牙塔
爾時樹神卽將七寶來至世尊所以神力故於一念
頃卽成四塔高五十由旬又造真珠樓觀及以白銀
臺於此四塔內各造臺觀具八萬四千卽造臺塔已
待我涅槃後迦葉結集竟當寫我教令大毗尼藏安
彼塔中我畱此塔汝好護持勿令損壞至我涅槃時
勅語文殊我於三大劫修無量苦行今得四牙已造

塔安竟令後末世法欲滅時令住利益正法興顯佛
告阿難我初成道時從河洗浴訖我苦行六年手足
爪甲不剪皆長七寸許時大梵天王見我爪甲長手
執七寶刀剪我手足爪甲我將付父王令善護持王
旣前後轉付典藏臣汝可往至彼道我須爪甲阿難
依命取來至世尊所佛開函取爪甲普示大衆我之
手足二十甲猶如赤銅色佛告大衆汝等天人龍神
等可將我爪甲當細熟視恐未來世中諸魔及外道
別將相似物換我真甲汝若疑非者當以金剛鎚鈹
以甲置鐵鈹上以鎚打擊無片損者乃真我甲若以

火燒煉變爲金色出五色光上照有頂見此相者是我真爪甲也佛告文殊師利及四天王等從此末法後多諸惡比丘滿閻浮提無有威德無有智慧至千四百年後汝將我十爪塔遊歷四天下一國住經七日如是周歷已當至香山頂阿耨達池中金砂洲上住至千五百歲我此大千界八百億國教初流行彼汝文殊師利分身變爲國王金剛齊菩薩分身爲大臣金剛幢菩薩分身爲比丘汝等三大士其流通我教幸不生疲勞懈怠也又問漢地塔寺古迹云何答曰今諸處塔寺多是古佛遺教基育王表之福地不

可輕也今有名塔如常所聞無名藏者隨處亦有如河西甘州郭中寺塔下有古佛舍利及河州靈巖寺佛殿下亦有舍利○秦州麥積崖佛殿下舍利山神藏之此寺周穆王所造名曰靈安寺經四十年當有人出荊州長寧寺塔是育王所造下有舍利入地一丈餘石函五重盛碎身骨益州三塔大石今名福感武誓今名駱縣等並有神異如別傳說有羅漢將往鐵圍山靜亂留小塔其塔大有善神旦現二魚井中鰻鱓魚護塔神也其側有足跡石上者云是前三佛蹈處也晉周時此土大有人住故置此塔又問若爾周穆已後

山神從佛請五百羅漢住此寺中即今現有二千聖

僧遶寺左側現有五萬五通神仙供養此寺僧除事云云

如前伽藍驗說

法苑珠林卷第五十一

校譌

第十五紙十一行不字第三十一紙六行密南第

二十九紙十行於下南

音釋

蜺研奚切鵙公洵切鄮莫候切瞬輪閏切鄞魚中

虹蜺也鵙鳥名鄮地名瞬目動也鄞魚中

名川時溱切鰻鱓鰻莫宮切篋莫結切燼徐

炎縣名鰻鱓力脂切魚名篋作篋無也燼刃

切火慄力錦切懾質涉切獷古猛切鑿烏兮誣疏

餘也慄危懼也懾心服也獷惡也鑿切誣疎

切廬龍都切陛部禮切維歷各切倭烏禾切齒初

切毀鏗鏘鏗丘耕切鏘七羊鈇其廉切



齒也鏗鏘切鏘鏘金玉聲也鈇鈇其廉切

歙縣居士吳惟明施贊刻此

法苑珠林第五十一卷吳江比丘明覺對 真

州王國英書上元縣茶榮刻

萬曆辛卯秋清涼山妙德庵識



撰述

法苑珠林卷三十一

三

